

周
易
正
解

周易正解卷十三

夬

乾上兌下

序卦傳曰。益而不已必夬。故受

物未有增益。盈滿不潰決者。夬所以繼益也。易道消
息盈虛。時中而已。盈滿壯盛。易之所戒。盈則必虛。壯
則必衰。銷患有素。而彌縫非一旦。不在倉卒成敗之
際。取勝一決而已。卦體一陰將盡。未決。兌上畫缺。有
澤決就下之象。故名夬。天下无成不毀。聖人因時調
劑。非乘小人孤立。衆君子併力一決之謂也。君子于
小人。旣不能杜于未萌。又不能禁于將盛。徒欲倚衆

強之勢。造次求決。此私智權力。非觀變時中之道。後世漢唐諸臣。屢用此敗。學易者。豈可枉聖人之旨。誤後世無窮乎。今玩卦體。乾下兌上。雖五陽方盛。孤陰垂盡。然健而能悅。剛而能和。无陵厲直往之氣。澤在天上。有決而欲下之機。天澤交而將復。陰自无違何事于陽之力。決也。與大壯相似。大壯戒用壯。夬戒用決也。初九壯于前趾。戒其往。九二惕號。稱其中。九三壯于頄。則凶矣。九四次且不前。許其悔亡。九五莧陸。不迫。稱其中。行蓋時有必至。一陰无號。終將自凶。爲五陽者。慎以防之。從容以俟之耳。故曰健而悅。決而

和不利卽戎脩文告邑。自利攸往。其旨曉然。以此防
小人。不致挑禍誤國。以此當機務。不致躁妄僨事。豈
甘心一擊之爲決乎。若夫崇陽遏陰。進君子而退小
人。義非一端。不待此而後見也。天理難持。人心易危。
君子易消。小人難退。由來已久。五陰剥一陽。其進甚
勇。五陽夬一陰。其退甚難。君子恬淡。不可則止。小人
綢繆。麾之不去。故陽長。杯水不能救車薪。陰退。燭火
猶可燔林木。盛衰之際。聖人防乎其防。而奈何輕言
決也。

夬。怪。揚于王庭。孚號有厲。告自邑。不利卽戎。利有攸往。

夬者。五陽逼一陰。將決而去也。陰方據陽上。故曰揚言其揚然。悅也。兌象。五爲王位。上在五前。王庭之象。孚。與五孚也。號。謹譁也。兌口之象。上與五同體。故孚悅。故號。小人狎大人。无忌憚之象。君側有邪臣。故危厲在下。曰邑。指九二也。告。戒也。九二志在急君。故告自邑中。使戒備也。然君側之奸。不利卽戎。但能儆備。而時極數窮。往自有利。卽戎。指九三過剛好進。恐其犯上也。

卦名夬者。兌偶上缺。爲毀折。爲附決。其位正秋。秋金也。乾亦爲金。天剛則缺。非謂速決也。夬不欲決。猶大

壯不用壯故其爻象與大壯畧同乾伏坤有邑象
彖曰夫決也剛決柔也健而說決而和揚于王庭柔乘
五剛也孚號有厲其危乃光也告自邑不利卽戎所尚
乃窮也利有攸往剛長乃終也

夫決斷也剛進而決斷乎柔也卦以乾遇兌乾健兌
悅健決悅和陽雖上進而不暴是以爲夫揚于王庭
者五爲王宮上爲庭一陰據其上揚揚然也孚號有
厲者九五居尊上六以陰成悅號呼倨侮無人臣之
度九五剛中有志附決故其危厲者乃所以畏孔壬
而思光大也告自邑不利卽戎者非四境之寇乃城

社之奸九三過剛上應欲攻之而投鼠忌器所尚乃窮寇不可攻惟戒備而已利有攸往者天時旣至陽道上進陰將自革豈待人力而後決乎

恆情乘人之危趨利輕敵動卽于凶君子定靜安而能慮故曰勿欲速勿見小利五陽共排一陰世所謂一決之力然而陽進至五其勢已極宜保其所已至勿爭其所未然已至者隨寓而未然者因時无入不自得矣

陽爻陰與陰剥陽至于五而已夬已剥不待上也上則陽爲復而陰爲姤故陰陽之盛不過五乾過五而

悔。坤過五而戰窮于上。必反于下。爲五陽計。與其姤也。元寧夫。故防危正在夫。聖人非教人競進也。世之言易者。失其旨矣。

象曰。澤上于天。夫。君子以施祿及下。居德則忌。

兌上乾下。是澤上于天也。澤上于天。未有不決以下流者。君子觀一陰在上。乾體未光。剛柔不決。有屯膏之象。故施祿及下。如澤之沛。若居積其德。壅而不施。則必爭。是乃所忌也。凡行惠施恩之事。喜決而忌居乘危構怨之事。喜居而忌決。聖人言外之意。可思。上天下澤。履。君子以辨上下。定民志。是澤亦本欲下。

也。陽因其有就下之勢。決之如所謂高屋建瓴水。非決其所不欲。故曰決而和。爻辭九五于上六无排擊之象。陰陽代謝甚相得也。豈人情乖戾之爲夫乎。

初九壯于前趾。往不勝爲咎。象曰。不勝而往。咎也。

九以乾初勇于上行。故爲壯于前趾。趾在下之象。言初視大壯之趾爲尤急。大壯陽進至四。而夫陽進至五矣。初以卑賤欲陵節上升。而陰方據五勢必不勝。往祇爲咎耳。象曰。初乾下宜潛。而恃壯自用。雖勝爲貪功。況不勝乎。所以咎也。處夫用壯。易之所戒。

夫自大壯積。故初與三猶存壯名。大壯上震爲足。初

下應爲趾。今夬五陽而初欲進，是尤壯于前日之趾也。然大壯初九有孚，夬初不言孚，何也？震本乾陽兌則坤陰也。

九二惕號莫

暮

夜有戎勿恤。象曰：有戎勿恤，得中道也。

九二乾體居柔得中處夬之時，剛而不暴，上六以陰乘五下與三應，二應五而鄰三君側有奸，不敢忘備而近憂。九三過剛懼其旦夕興戎，故爲聞號警惕。莫夜有戎寇之象。上六小人悅以求容，二以乾惕難悅，自足以防奸折其揚揚之氣，不必張皇陵迫，過爲憂恤也。象所謂告自己邑勿用，卽戎以此。象曰：有戎勿恤。

者六二得中道故能處夫不躁亦不忘備也

乾中爲坎變離離爲日坎爲隱莫夜之象坎爲盜離爲兵有戎象乾九三終日莫夜之象三以過剛應上有卽戎之象故二憂惕象所謂告自邑也

二之惕非惕于上之來三也惕于三之欲往上耳蓋三本重剛勢欲決上而二與之鄰恐其挑禍越禮如大壯九三觸藩則凶矣故不憂上難去而憂三興戎老成持重臨事幾密之見三上所以得免于搆惟以有二也如大壯九三觸藩羸角正以其過剛亦惟二五得中能盡處壯之道也

九三壯于頄求葵二音有凶君子夬夬獨行遇雨若濡有愠无咎象曰君子夬夬終无咎也

成敗之際貴于詳審處最勝之事克終惟艱九三以陽居陽乾健之極當夬之時與陰爲應悻悻求決壯形于頄有卽戎之色進必犯上故凶頄顴頰間骨凡鬪很者其頄必壯若君子應變從容夬而再夬不徑情一決也陽雖有五三獨應陰受澤之潤故爲獨行遇雨陰以潤爲悅而陽以濕爲愠非道不悅自可无咎豈必迫人于危興戎以爲夬乎象曰凡夬之義以一爲斷一決求勝九三所以凶也君子臨事而再思

夬夬然不敢輕斷故无咎夬夬者不一決之辭三變重兌有缺而又缺之象故爲夬夬乾爲首變兌則互離離目兌口間其象爲煩遇雨若濡兌澤之象有愠不悅之象三爲人位乾九三君子之象蓋指九二得中以戒九三也

上孚五爲悅三進決上必先陵五犯君故凶大壯上六所以設藩用罔而九三羸角者正以此君子遇上惟愠而惕和而不同嚴而不惡未可冒昧直前快意于一決也

九四臀无膚其行次茲且直牽羊悔亡聞言不信象曰

其行次且。位不當也。聞言不信。聰不明也。

九四兌始爲和。其進不決。與初敵應。初健而其趾壯。四悅而其臀无膚。膚。肉也。无肉。言不壯也。次且。行不進貌。兌爲羊。羊性前牽。則不行。九四下乘乾剛。不得不進。上與五遇。不敢徑前。故有此象。然處夫而不失和。其悔可亡。與二同功。二惕號告邑。四聞言不信。與悅同體。故忘備也。象曰。其行次且者。以剛居柔。故進不決。聞言不信者。不中不正。无聽德之明也。雖非九三過剛之凶。然悅而忘戒。亦豈處夫之道乎。

四與初應。初爲趾。故四爲臀。不中。故爲皮膚之象。膚。

无骨柔象兩剛敵應无肉之象乾爲言四變坎爲耳聽不聰之象

九五莧

現

陸夬夬中行无咎象曰中行无咎中未光也

九五陽剛中正上比于陰而悅之孤陰將盡微弱如莧五以陽居澤中高平如陸悅而承之夬夬然取之以時用之有節非過時而不採亦非一拔而遽盡既不滋其長又能盡其用循循有常中行之道是以无咎象曰中行則盡道矣僅免于咎何也陽與陰爲悅陰未全消乾道未得光大也蓋盈虛有時善持盈者與時偕行人主制馭小人如莧生陸常能夬夬于平

時何用取決于一日。若其養奸樹惡。使高張蔽日。雖破斧缺斨。未易驟拔。而乃歸咎于決之不勇。豈不誤乎。

莧菜名陰物。五月始生。莖葉柔脆易斷。孤陰之象。高平曰陸。澤在天上。有陸象。五上同體。六乘五有莧生于陸之象。陽勝而猶相得。所謂決而和也。大壯之六五。陽進而陰相忘。夬之九五。陰退而陽相生。陰窮于上。莧生于五。亦猶大過陰在上。而九五枯楊生華。皆將絕之餘氣也。夬夬如摘莧者。朝夕採取。非頓盡也。夬不用壯。五變則爲震。二偶在上。有缺而又缺之象。

故亦爲夬。震爲蕃鮮。有覓象爲大塗。有陸象。陰陽消息自然。原非迫于不得已。五上剛柔相決之際。而爻象覓陸。見天地聖人盈虛消息。和而悅如此。解者以夬夬爲速決失之矣。

上六无號終有凶。象曰无號之凶終不可長也。

六以一陰據五陽上。孤立无偶。始猶悅而聞號。及陽道浸滿。覓陸將盡。寂不聞號。終有決絕之凶矣。象曰无號之凶。五陽漸逼。一陰垂盡。其亡已決。不可長久也。

上六无號之凶。非諸陽排擠之時。至數窮陰雖欲長。

號不絕。自不可得。九五雖欲悅。上不決。亦不可得。故曰。聖人不能爲時。能不失時而已。

姤

䷫

巽下
乾上

序卦傳曰。夬者。決也。決必有所遇。故受之以姤。姤者。遇也。一陰分決于上。忽復遇于下。姤所以反夬也。造化之理。一與二。奇與偶。如形與影。故曰。一陰一陽之謂道。自天地男女事物。細至呼吸。莫不皆然。故夬則必姤者。天也。聖人不能絕陰。而不能不愛陽。愛陽而喜其來。不能不惡陰。而幸其去。幸其去則曰夬。而驚其來。則曰姤。姤者。不欲遇而不可避之名。爲卦乾上

巽下以二體觀乾剛巽柔柔與剛遇其遇甚合以一
體觀五陽上極一陰下來其來甚順陰陽之情不爲
不相得而姤之一陰卽坤之履霜未幾而遯未幾而
否觀剥且至故陰之害陽陽不覺也聖人作易以著
消長之幾盛衰盈虛非能與造物爭而因時保護則
存乎其人故爻辭于否泰之際曰包荒包承于姤曰
包魚包瓜以見天不可違而調燮貴適時今之言易
者夫則欲其決去姤則禁其相逢必欲使天下有陽
无陰夫苟有陽无陰聖人可无憂而易可不必作矣
不能體陽陰之德以通其變徒欲絕陰存陽聖人豈

爲此偏曲之論且如姤之爲卦何嘗不善乾道上運
巽風下行帝出乎震物齊乎巽相見乎離遇之象也
九五陽剛居尊初以一陰方來有臣民遇主之象九
二剛中下應爲大臣宣化之象是九五所用以招攜
懷遠風行下國者也文王彖辭以爲男女之交夫子
發天地萬物皆遇之義聖人何嘗以姤爲不善引而
伸之六十四卦皆可知已

姤女壯勿用取娶女

姤遇也一陰方決于上復遇于下巽長女故爲女壯
上與乾遇五陽并盛一女獨進其守旣不貞而以羣

亢之陽爭應則剝蝕之患生巽入而乾不覺方喜其遇故聖人戒之

彖曰姤遇也柔遇剛也勿用取女不可與長也天地相遇品物咸章也剛遇中正天下大行也姤之時義大矣哉

彖所謂姤者遇也巽柔遇乾剛也勿用取女者女長則陰盛陰壯者陽衰之漸乾遇中女爲同人遇少女爲履與長女遇則爲姤且爲遯爲剝故漸不可長也然方遇之時正其盛時乾施巽入天行東南與地相遇春夏之交品物齊見咸亨章明會合之時也二五

皆剛。君臣一德。陽道未損。天下大行之會也。天地不遇。不成變化。君臣不遇。不成治功。男女不遇。不成生育。遇時卽盛時。盛時卽衰至。然則遇之時義豈不大哉。文王所戒者。微陰而防其盛也。孔子所贊者。陽盛而謹其微也。其義則一。

象曰。天下有風。姤。后以施命誥四方。

乾上巽下。是天下有風也。陰陽相遇爲姤。人君觀象以乾爲施。以巽爲命。誥戒四方。四方不得見后。因命誥以與后遇。是風行天下。姤之象也。

初六。繫于金柅。

你

貞吉。有攸往。見凶。羸。

雷

豕孚。蹢躅。

軸象曰繫于金柅。柔道牽也。

初六以一陰爲巽主。乃其所爲妬者也。陰方自夫而下。卽與五陽遇。无所適應。故爲繫于金柅。以木室物曰柅。卦體本乾。乾爲金。乾健行。而初陰忽滯其底。其象如此。巽爲繩。有繫象。孤陰上附。若繫然也。爲成妬之主。可遇而不可求合。安固自守。乃爲女德之正。從一之義。故吉。巽入而隱。上與四應。而非包主。不宜往見。事非其主。則違命而凶。羸稚弱也。初陰在下。小豕之象。坎爲豕。巽體似坎。未成。故爲羸豕。豕性躁。其形俯。亦巽象。遇二爲孚。初陰方長。能權能制。故爲蹢躅。

跳躍之狀也。一作彳亍。兩足一步一往曰彳亍。巽爲股。爲進退。陰長難制之象。象曰繫于金柅者。五陽方剛。一陰以柔情牽繫之也。

舊訓柅。絡絲之器。女子所有事。二遇初。以金爲柅。以其絲繫之。猶曲禮女子許嫁則佩纓。示有所屬之義也。巽互離木。中含火。火生風。風化蠶。蠶爲龍馬之精。龍大穴。馬火畜。故絲自穴出。東風動而蠶生。巽爲蠶絲也。一陰在下。五陽被繫。有牽絲之象。夫上一陰。五陽上往。姤下一陰。五陽下來。剛柔相求之情如此。巽爲命。初爲民。九五乾剛中正之主。初雖遠。莫非風。

教所被也。雖與四應。姤不主應。后施命誥四方。以志
遇。不以往見爲遇也。初若往見。則必于四。有明主而
事无魚之賓。豈但失二之包。逆志違命。故凶也。羸豕
孚蹢躅。卽書云民罔常懷。善則得不善則失之義。
陰之有權制者。莫如巽。以其善入而隱也。非九二剛
中。仰承九五陽剛中正之主。不足以繫之二之包。初
蓋五以之也。故九五有以杞之象。金爲乾。指五。杞爲
木。指二。故曰。莫强于民。得乎丘民爲天子。五所以用
二包初也。

九二。包有魚。无咎。不利賓。象曰。包有魚。義不及賓也。

以陽居二。初陰方來。二獨先遇處姤之時。遇斯爲得。故二得包魚有之。巽互離有魚象。陰陽相姤有包象。巽入在下。陽在外爲包。二雖非正應。姤主近民。近則先得。何咎之有。四雖正應。而先遇者得魚。魚已有主。則四反爲賓。是魚也。賓所不得享矣。象曰賓之有魚。義也。以遇爲獲。義不得及賓也。

包有懷保之義。二包初。非能自包也。三牽于初。而无因。可致四有因而遠。不能有。唯九五爲遇主。二爲五應。故五以二得初。二雖與初姤。終能有初者。惟五耳。若二。所謂奔奏疏附之臣。諭德宣譽。率下親上者也。

九三臀无膚其行次且厲无大咎象曰其行次且行未牽也

三即夬之四在夬爲兌陽上悅乎陰和而不肯決在姤爲巽陽下遇乎陰牽而不能上故其象皆爲臀无肉其行次且然夬陰將去而陽不行猶可言也姤陰方來而陽受制不亦醜乎但與巽同體雖次且不行非爲陽之咎大爲陽巽本陰也巽爲股有臀象九三過剛无膚之象巽爲進退不果次且之象象曰其行次且者夬之九四所悅在上牽羊而前故能悔亡此之九三所入在下其行未有牽而上者不免于係戀

之醜矣

九四包无魚

句起句

凶象曰无魚之凶遠民也

四與初正應所謂魚之賓也賓宜有魚先遇二入其包故四爲包无魚巽入而隱入于下則不起起猶上也卽初所謂有攸往見也往應則失其所謂金柅之貞是四與二爭主此魚上違九五之命也故凶象曰无魚而起爲凶者陽爲君陰爲民在遇不主應九四以遠民失民苟初起而見失其所爲姤矣下取諸二之包勢不能得上无五之命義不當取是以凶也卦體惟以初四兩爻宜應不應所以爲遇而成姤能

近民者莫如二遠民而能有者莫如五四遠則不能
有君臣之分也四遠民而強親與初遠四而強起皆
爲苟合民可近不可遠二得中故近民而民受包四
失中故遠民而民不起

九五以杞包瓜含章有隕允自天象曰九五含章中正
也有隕自天志不舍聲命也

卦體一陰初生于无位之地二五諸陽當位者俱无
損傷九五陽剛中正本乾飛龍之主而初以潛龍變
爲羸豕仰觀在天利見之運未改如杞高大之木枝
葉龍從而滋蔓易生之瓜附繫其下杞方包容而不

覺也。瓜生于陰月。巽木用事。東南萬物相見。一陰始
生。麗于陽。而含其章。美方決于上。忽姤于下。若隕之
自天然。是九五之文命。風行下國。无遠弗訖也。杞美
材。指九二。巽爲木。瓜指初六。初承二。似艮爲瓜。以五
以也。巽木高長。故自初上達于五。五爲姤主。故一民
莫非其臣。非如四之遠民者比也。五二正應。二之包
初。以五之命。故爲以杞包瓜之象。含卽包也。章卽瓜
也。剛柔相雜。成文章。初二命誥之象。隕落也。有隕自
天。巽命下及之象。天。乾象。指五也。處姤之時。后不得
與海隅蒼生遇。而以其志寓諸文章。播告下國。窮遐

僻壤如身與后遇。大象謂施命誥四方。此也。象曰。九五含章者。陽剛中正。雖一陰方來。祇麗而爲章美。上遇明主。小人變爲君子。惟有中正之德者。能之。彖傳謂天地遇而咸章。剛遇中正而天下大行。此也有隕自天者。九五居尊。以天下爲度。與初非應。非比。然志以命宣。不以微賤舍也。命指初。巽主有命。象舍猶遺也。志謂求民之志。卽所以含章而風之下者也。

上九姤其角。吝。无咎。象曰。姤其角。上窮吝也。

上九過剛。高而无位。復何所遇。下與九三敵應。乾極爲亢。巽極爲躁。不復能包。故爲姤其角。忤觸之象也。

遇而以觸其誰與之踴踴涼涼故足羞吝然亦異乎
苟合者故无咎在卦之上有角象象曰姤其角過高
而道窮故羞吝也其陳仲子之流與

上卽夬之初初在下爲趾故反上爲角夬之趾角兌
羊之象也姤之臀膚角皆自夬來也

萃

䷬

坤上
兌下

序卦傳曰姤者遇也物相遇而後聚故受之以萃萃者聚也爲卦下順上悅順而悅故羣處和集而不忤禮讓以相與仁孝以相親而後不偷各從其類而後无爭戒備不虞而後不亂君臣相悅而後可治咨嗟憂懼而後可保故彖言孝享所以教也象言戎器所以備也六爻皆有補過之辭而初之號三之嗟上之涕洟所以懼也其道皆本于順而悅有家者知此則家用輯有國者知此則國用康萃之義也其卦與比相似比地上有水而萃地上有澤澤水所聚也故爲

萃比廣而萃差狹比一陽而萃二陽也。一則兼統二則權分。比所以顯而萃所以未光也。

萃亨。王假格有廟。利見大人。亨利貞。用大牲吉。利有攸往。

人心所聚自然亨。通衆聚莫如王。聚而肅雖莫如王之假廟。假與格同。衆聚則必有仁者在高位。統之故爲利見大人。亨而利于正。不正雖聚必散。其假廟也。物聚而財阜。時和而禮豐。故爲用大牲吉。其見大人也得衆而用之。人心悅而從之。故爲利攸往下卦互艮爲門闕。遇巽木有廟宮之象。坤爲牛。兌爲刑殺。有

大牲用享之象

彖曰萃聚也順以說悅剛中而應故聚也王假有廟致孝享也利見大人亨聚以正也用大牲吉利有攸往順天命也觀其所聚而天地萬物之情可見矣

萃以聚爲義上悅以使民而民順以從上九五陽剛六二柔順中正相應所謂順悅非邪妄之私故聚而亨也王假有廟者衆萃于王王以其衆萃于廟致其仁孝享于祖考无言靡爭精誠合一萃之至也利見大人亨者天下惟一王上有明主而天下歸之聚以正也用大牲吉利有攸往者天道時中而已天子格

廟而損用二簋是數米而饗三軍也大人利見而儉德避難是當暑而服袈褐也禮貴適中事在因時人心順悅天命可知何苦爲纖嗇之事所以順天命也造化之理不外人情即天地萬物之情惟順惟悅可以格神可以致治仁孝之道帝天之命不外人心順悅而已天地萬物之情又豈出順悅之外乎象曰澤上于地萃君子以除戎器戒不虞

兌上坤下是澤上于地也澤水所聚上于地其潰決宜防也君子觀象知衆之所聚其變易生簡除戎器修飭其敝以防不虞兌秋爲金兵象也坤爲衆師象

也。大抵順悅之時。易所爲憂危之時也。

初六有孚不終。乃亂乃萃。若號。號一握爲笑。勿恤。往无咎。象曰。乃亂乃萃。其志亂也。

萃以羣陰係于二陽。初六以陰居陰。在坤之下。坤爲衆。在下委靡。无堅貞之志。上應九四爲有孚。而九五以陽爲萃主。四五互巽爲不果。初應四。又欲應五。故爲不終。羣衆亂萃。莫適爲應。初若號。四必下應。一見握手。相爲歡笑。順以求悅。可勿憂恤。往因四以萃。五何咎之有。象曰。乃亂乃萃者。處羣萃之中。其志亂也。

卦體以順遇悅互巽不果故有混亂之象四與初應而下比三三爲終故初疑四與三比爲不終孚之象兌爲口巽爲號互艮爲手有握象兌悅有笑象上體似坎有憂恤之象

六二引吉无咎孚乃利用禴象曰引吉无咎中未變也六二柔順中正爲衆陰主上應九五引衆同歸君臣之大義故吉于萃道得而无咎也然坤衆羣處其志紛紜九五雖當位下乘九四之剛衆心未固猶爲匪孚之主必待既孚乃可通微誠也夏祭曰禴其禮簡而萃用大牲上下苟孚樽酒簋二可以納約若其未

孚雖大牲豈見信乎。此戒九二之辭。處萃之時。誠敬爲本也。象曰。引吉无咎者。初與三皆不中。而有異志。六二中正。不與初三俱變也。

互艮爲手。互巽爲繩。有引象。兌爲巫。有享神之象。

六三萃如嗟如。无攸利。往无咎。小吝。象曰。往无咎。上巽也。

六三不中正。无應。亂于衆羣。故爲萃如。與上敵應而皆无侶。故上涕洟而三嗟如。兌爲澤。爲口之象。近比九四而四自有應。故无攸利。然旣與四聚。往亦无咎。非應而往。小有羞吝耳。象曰。往四无咎者。往則上互

周易正義 卷十三 三
四爲巽巽入也處萃而能悅以入何咎之有傳于此
爻明指互體示人矣

九四大吉无咎象曰大吉无咎位不當也

九四以陽據坤上有先得衆之象處下順上悅之間
而衆陰先歸是因大而得吉也陽爲大九五剛中之
主同體相悅下无逆志上无猜嫌故四雖權重處多
懼之地而猶免于咎也象曰九四大吉无咎者補過
之辭位非君而有衆是臣所不當也萃之不得爲比
者徒以有九四一爻而彖謂利見大人欲衆知有五
耳

九五萃有位无咎匪孚元永貞悔亡象曰萃有位志未光也

九五陽剛居尊四陰皆其所有九四據之而位不當故九五爲萃有位之象雖有強臣在下同體相悅于君道未有所失但羣陰承四者多人心未盡孚九二欲引而不敢用禴爲五計者惟體元足以長人能元善永貞庶乎仁積信成匪孚之悔可以亡耳象曰九五雖有其位九四在下分民而治未得如顯比之光也是故比之元永貞言于象而萃之元永貞言于五其望五深矣

上六齋咨涕洟无咎象曰齋咨涕洟未安上也

凡萃之道下則多聚高則寡與上六以陰居萃之極下无正應是以齋咨嘆息涕洟交流目出曰涕鼻出曰洟兌爲口爲澤互艮爲鼻故有此象然悅極能懼雖寡與无咎也象曰齋咨涕洟者羣陰萃于下上六思得朋不安于上也方以類聚何咎之有及下爲升初則大吉矣

齋古借作嗟一說齋持也上與三相持咨嘆也

升

䷭ 巽上坤下

序卦傳曰萃者聚也聚而上者謂之升故受之以升

天生衆民稠伍之中必有英傑起而長之孟子曰拔乎其萃升之謂也升以漸進古者鄉國拔士俊秀者升之大學大樂正升之王王論定而後官自韋布以躋崇顯歷級而進故其卦取諸巽坤坤順也巽入也巽由下而入前臨坤而順木出地中與土相生入之深而達之順發榮滋長參天之材所由起故謂之升然反萃而得何也萃坤居下爲羣衆之象拔自羣醜而登之民上故倒萃爲升也當其爲萃陽居四五有臨下之象四當五前未光倒下則陽居二三有上升之象所以反萃也大抵爲臣以柔順爲本獲上治民

必以巽夫子論在下位推本于信友順親卽此意焉
有陵暴好上而能升者乎

升元亨用見大人勿恤南征吉

升進而上也有大亨之道用見大人者用此道見大
人也衆陰在上故曰勿恤巽坤之間南離之位人臣
之利鄉也巽順者升之善物南行則吉而升矣

彖曰柔以時升巽而順剛中而應是以大亨用見大人
勿恤有慶也南征吉志行也

剛升柔降以巽遇坤皆柔而卦爲升何也以時升也
巽木春夏相見乎離往役乎坤所以升耳巽在下而

入坤在上而順。二以陽得中。上與柔爲應。所以大亨也。用見大人勿恤者。用此巽順之道。可以見大人勿憂恤。必得升而有福慶也。不曰利見者。五位无大人也。詳見本爻。南征吉者。巽坤之間位正南。行乎巽坤。則前往西南。平易而志行也。天運自東南而西。生長之方。順而吉也。

象曰。地中生木。升。君子以順德。積小以高大。

坤爲地。巽爲木。爲高長。坤在外。巽在內。故爲地中生木。木生于地。自句萌而枝葉出土。而干霄曰升。日進罔覺。順之至也。故君子之德。莫大于順。學問之功。莫

純于順。巽坤皆順也。寬裕溫柔以養心。優游自得以爲學。无陵節之行。无襲取之弊。寸綵積累上達高明。如木生地中。君子之升也。

初六允升。大吉。象曰。允升大吉。上合志也。

初六以陰居下過柔。然爲成巽之主。入之至。故信之深。而陽不能違也。進與二允。二方有孚于五。豈能舍初獨升。故爲允升。是以大而得吉也。象曰。允升大吉者。升之爲道。以次而進。初與二合志。有賢達爲汲引。所以升也。初无正應于上。而比于二。二五合志。二與同升耳。

升高必自卑。巽木高長。託根在下。故初最吉。夫士未
有不能入人而能進者矣。

九二孚乃利用禴。无咎。象曰：九二之孚，有喜也。

二在萃居五。所謂有位匪孚者也。彼一時也。爲六二
者。欲待其孚。而後用禴。以九在四。未能通五耳。今來
居下。二變爲陽。五變爲陰。上无阻隔。二實五虛。以中
相應。故爲孚。乃利用禴之象。微誠薄悃。不事浮飾。可
以上達。如是則不致有咎矣。大抵處升之時。以剛直
之臣事謙冲之主。惟誠信可忘形迹。去虛文而相得。
故无咎。然不言升。何也。六爻惟二與四不言升。二承

九三過剛巽究爲躁舍正應而求三无升理也。四近五升則逼君也。象曰九二之孚者上與五通而升可期故有喜也。

九三升虛邑。象曰升虛邑无所疑也。

九三在萃居四得衆位不當而疑于君者也。今來居三爻位已改有虛邑之象。詩云升彼虛矣亦舊邑也。蓋在萃五受其蔽二不能達在升二自成孚三不能礙如貴人已去而采地猶存且過剛多凶上无正應與冥相值亦虛之象也。由此南征坤土平曠无復沮礙亦升虛邑之象也。象曰升虛邑者三本剛而好升。

上遇坤順如踐无人之境故无所疑又上承六四王
遷于岐此其空邑與凡易象多端類此

玩九三一爻雖不中正居巽之上互爲震主本諸侯
之位將有進爵爲王之象蓋爻辭取象文王受命之
事耳詩云周雖舊邦其命維新三如舊邦四如文王
康岐受天命也

六四王用亨亨于岐山吉无咎象曰王用亨于岐山順
事也

以六居四在坤之下柔順之至升至此蓋臣位之極
已德與位宜故能臨下不驕奉上不倍文王以之三

分天下有二。猶以岐山之貢享于殷。順之至也。周道所以日升。吉又何咎。岐山。西土。坤在兌上之象。互兌爲西。爾雅。二達謂之岐。偶象也。山高升象也。象曰。王用亨于岐山者。順以事上也。

六五貞吉。升階。象曰。貞吉升階。大得志也。

六五居上之中。蓋尊位也。處升之日。虛天位而待大人。必守貞得吉者。乃能升其階。非岐山之王而誰也。階。地象。貞。坤德。升階。揖讓而升也。升之者。六四也。湯武之征誅。非升階之禮也。象曰。貞吉升階者。在萃之時。以剛居五。下乘九四。其道未光。今以柔順中正而

升天下順之。非復有位匪孚之比。故曰大得志。爻辭蓋指文王之事。而文王未王。故五位不卽真若武王揖讓不足。未可言升階矣。周公脩辭立誠如此。作周恭先豈不信然。

上六冥升。利于不息之貞。象曰。冥升在上。消不富也。

上本无位而升。道過五陰極爲晦。是宴息之鄉矣。鐘鳴漏盡升而不已。故爲冥升。以處名位宜知止息。惟脩道德則利貞耳。蓋功名事業俱屬有爲。惟道與冥合。浮生過影俱屬无常。惟道爲不息。士君子明良遇而大業終。合朝華之崇顯。尚幽貞之恬澹。一念萬年。

終古長存。是不息之貞。乃所利矣。如更求名位。以升是夜行也。所以序卦。繼之以困。象曰。冥升在上者。名位既極。大業既終。无長不消。究歸于空。三邑既已丘墟。上富焉能長保。人世升沈。信如浮雲哉。

六四。文王所以爲臣止敬也。六五。文王所以宜王不王也。上六。文王所以純一不已。在上而於昭于天也。

周易正解卷十三終

周易正解卷十四

困

兌上 坎下

序卦傳曰。升而不已。必困。故受之以困。夫升而能已者。天下鮮矣。涉歷久。則其力憊。登陟崇。則其勢危。困道也。由升得困。故爻以往爲凶。來爲吉。二征凶。三入宮。凶。四來則有終。五下應。則有悅。所以然者。何也。困自坎適兌。猶蹇自艮適坎。逆天之行。故自兌適坎。爲節。自坎適兌。爲困。卦體本乾坤否。坤以二往。乾成兌。乾以上來。坤成坎。是爲澤中无水。內互巽木。澤竭則木槁。故困。困者囚禁之義。彖傳所謂揜也。如敵困圍。

中。六爻往來皆于內。互爲家人。互巽木。又互離火。坤爲土。乾兌爲金。坎爲水。五氣雜而生克相持。坎險在下。三陰爲困。自下往上。三陽受困。自上來下。來者齟齬不得遇。往者中外遞塞。株木內障。疾藜中拒。葛藟上蒙。九二在險。九五同德。爲拯困之主。而隔于四。四與初應。而隔于二。必待四來初。而後五得與二遇。苟三不去其疾藜。則四未得行。而上不去其葛藟。則五未得通。故爲困之害者。莫如三上。三上去而可无憂于初矣。雜卦傳曰。困相遇也。遇者姤也。三上變則成姤。五以二爲杞。以初爲爪。命通于初。而五爲含章。自

天之主矣。大傳云：困窮而通此也。大抵困交困也。陽困則陰亦困，陽困爲酒食金車朱紱，悅而在內，困亨之象。陰困爲木石疾藜葛藟，險而在外，困人之象。困之爲字，木在口內，木者陽之生氣也。卦互巽，木在中，木歷坎地則彫，逢兌金則刑，反而東行，木道乃亨。是以爻象皆言來，亦猶蹇利西南，不利東北也。嗟乎！古聖明賢哲，鮮有不困者。惟處險而悅，則險不能陷。有坎之信，可以習坎；有兌之悅，可以亨困。彼木石疾藜，剗削葛藟，天所以王成君子也。酒食朱紱金車，卽存于饑渴勞苦之中。困何負于人乎！

困亨貞大人吉无咎有言不信

困閉不通也。凡閉而不通者。有亨通之道。在安固守正而已。惟有剛中之大人。乃能亨而得吉。夫困雖大人不免。何咎之有。兌爲言。坎爲信。以兌處險。有言不見信之象。夫困豈言所能亨乎。

彖曰困剛揜也。險以說困而不失其所亨。其唯君子乎。貞大人吉。以剛中也。有言不信。尚口乃窮也。

坎爲剛。兌爲柔。坎一陽揜于二陰。兌二陽揜于一陰。初上皆陰。而三陽閉于內。是剛受揜也。故謂之困。下險上悅。則遇困而道不困。身困而心不困。故謂之亨。

其唯君子乎。君子。卽大人。貞。卽所以亨也。貞。大人吉者。陽剛中正。如九五。則貞吉也。有言不信。兌口爲言。坎堅多心。爲信。澤中无水。有言不信之象。是尚口耳。乃所以困窮也。尚上也。兌上缺之象。處困在脩德。非用言可免也。

象曰。澤无水。困。君子以致命遂志。

兌澤坎水。水宜在澤。今澤在水上。是无水也。巽木失潤。故爲困。君子觀象。不以患難爲恐。委曲盡道。極致其命。而求遂其志。險而能悅也。士平居從容。孰不言命。至于困窮。審時知幾。成敗利鈍。毫髮无爽。然後可。

以極致其命而不負其生平。雖危必濟。雖死得所。苟一毫未盡。猶匪正命。其不遂志。將誰尤也。或謂致者。委而棄之。則是告子之不動心矣。

初六。臀困于株木。入于幽谷。三歲不覿。象曰。入于幽谷。幽不明也。

以陰居困之初。在險之下。困之至也。困則无所往。坐而不行。故爲臀困于株木之象。坎爲豕。初在下。有臀象。株木。樸檉短木也。猶侏儒之侏。初陰爲坎于外。有豚柵之象。坎爲隱伏。爲溝瀆。初最下。爲入于幽谷之象。上與四應。隔于二。而不得見。凡歷三爻。爲三歲不

覲之象。象曰：入于幽谷者，二互三爲離，明不及初。初當坎北，幽暗不明也。

卦以坎錯兌，坎冬也，兌秋也。由冬之秋爲逆，故爻象自上來下，而卦因升致困。故爻象爲降及升，上六爲葛藟，一陰始秋，蔓草未殺，夏木无傷，故有葛藟在樹之象。六三，秋冬之交，草脫葉而刺存，澤水落而石見，故爲石與蒺藜之象。初在坎下，正冬霜雪降而木隕，寒山幽谷之中，見枯株而已，故爲株木幽谷之象。三爻皆陰柔，故皆繫以草木也。然陰困陽而象反自困，何也？夫受困與困人，其爲困同也。小人不險，則不能

陷人。欲陷人。則必先自險。受陷者。剛貞不失其所。則困頓坎坷。祇爲進德之資。彼機械陷阱。反以自憊耳。故三陽困而爲悅。三陰險而自陷。其象如此。若君子平易待天下。則人已共適矣。

九二。困于酒食。朱紱弗方來。利用亨亨。祀征凶。无咎。象曰。困于酒食。中有慶也。

二自乾來。在險爲困。然陽德正中。困而不餒。故爲困于酒食。坎中滿有酒食之象。九五同德。下應。故爲朱紱方來。大赤曰朱。乾爲大赤。坎中乾象。紱蔽膝也。垂于股。詩云。赤紱在股。五互巽爲股。爲綵。坤爲裳。故有

朱紱之象。君紱朱。臣紱赤。詩云。朱紱斯皇。君也。赤紱三百。臣也。亨與享同。祀上曰享。逮下曰祭。二享五祭也。二五非正應。以誠相通。故曰祭享。誠可格鬼神。斯可通險難矣。自初至五互爲渙。有享祀之象。兌爲巫。爲羊。坎爲酒食。爲豕。爲樂。互離爲牛。乾坤爲衣裳。有祭祀之象。征凶者。在困宜來。不宜往往。則坎兌逆行。而重困。理數適然。九二剛中。非其咎也。象曰。困于酒食者。二雖互險。陽剛得中。不失其所。上有拯困之主。君臣一德。雖困終遇有福慶也。兌爲悅。有慶象。卦體困而爻爲酒食。朱紱金車。何也。聖人所謂困者。

失其所也。君子素貧賤，患難不失其所，則无困不亨。雖木石疾藜葛藟，容何傷？苟中无自得，即富貴酒食朱紱金車，皆斧斤纏索也。故爻以陰困爲憂患，以喻小人。陽困爲福澤，以喻君子。蓋甘之傷人也，毒于苦。癢之難持也，楚于痛。金屑之病目也，翳于塵埃。文王之困也不難于姜里之囚，而難于三分有二之日。處富貴而沈溺不起，與憂患而嗟咨涕洟，其戚戚之懷一也。故顏淵瓢飲，季路緼袍，乃所謂酒食朱紱而桀跖之株木疾藜，祇自荷其滅耳之校矣。

六三困于石，據于蒺藜，入于其宮，不見其妻凶。象曰：據

于蒺藜乘剛也。入于其宮不見其妻不祥也。

三以陰居陽。承乘皆剛。故爲困于石。據于蒺藜。石指九四。兌爲剛。鹵石象蒺藜。茨也。其子如菱。生澤邊道傍。一名止行。坎爲蒺藜。蓋指九二。澤水落而坎石見。秋冬之間。蒺藜子成。澤畔難行。故有此象。互巽爲入。坎爲男。爲宮。爲隱伏。三本坎男。上爲兌女。三以上爲妻。而非正應。故爲入宮不見其妻之象。困窮如此。其凶可知。象曰。據于蒺藜。下乘九二之剛。退无所歸也。入其宮不見其妻。上无正應。進无所往也。小人爲險自滅。不祥也。蓋困將遇。則三變爲大過之死亡。故爻

曰不見傳曰不祥

四五兩剛當前三不能進故爲困于石退仗二爲險主故爲據于蒺藜蒺藜軍中以鐵爲之布地禦敵蓋阻四之來下也四金車徐徐五朱紱之困皆以此九四來徐徐困于金車吝有終象曰來徐徐志在下也雖不當位有與也

以陽居四下與初應其體本悅又互巽爲不果故爲來徐徐金車指九二兌秋爲金坎爲輪輿四欲拯初而隔于二禮金輅以錫同姓四近五貴故乘金輅來而遇三之蒺藜不得與初遇故爲困于金車之象蓋

其位本不正。驕于貴寵。急難不敏。未免羞吝。然困極而通終必遇也。象曰。來徐徐者。志在初也。剛居柔位。雖不當而初爲其所與。程正叔謂寒士之妻弱國之臣。各安其正而已。苟擇勢而從。則惡之大者。不容于世矣。故雖无纓冠之勤。視之竊位蔽賢。坐視知己沈淪。不顧者。爲猶賢矣。故曰。雖不當位。有與也。

九五剿

異

刑

月

困于赤紱。乃徐有說。

悅

利用祭祀。象曰。

剿刑志未得也。乃徐有說。以中直也。利用祭祀。受福也。九五陽剛中正。所謂大人也。處困之時。其體本兌而一陰毀于上。以虧其進。下與四互爲巽。而一陰入于

下以阻其來故爲剝。剝之象缺上爲剝。缺下爲剝。乾體上下俱困之象。赤紱指九四乘金車服赤紱貴臣之象。四將往初而阻于二。五欲應二而隔于四。故爲困于赤紱。謂五困也。然五以剛居尊爲中直之主。將上平六下除三變困成姤。以二包初。羸豕孚而二與初皆遇矣。彖謂大人剛中吉者以此。故爲徐有悅之象。祭祀誠意也。二五非應。剛中同德以誠相感也。象曰剝剝者五本乾體困于二陰之間。進爲兌所剝退爲坎所剝。志未得遂也。乃徐有說者九五乾剛中正致命遂志。不以言而以信。故能拯困而爲亨也。直猶

正也。利用祭祀者。誠意相通。君臣一心。故能亨困而受福也。中直奇畫居五之象。

卦所以成困。惟三上兩陰。五爲卦主。故有剝削不得志之象。剝削有二義。五本乾體。二陰上剝下削。有毀乾之義。九五剛中居尊。憤四上之不馴。有剝上削四之義。小人去。君子伸。君道光而困可亨矣。三上變成姤。姤遇也。故雜卦傳曰。困相遇。蓋柔之揜剛。塞于近而後障于遠。人主能去左右之奸。儆于在位。則頑梗自消。如齊威王誅阿大夫。及左右譽阿者數人。而齊國大治。九五中直之才。足以亨困。惟去其爲剝削者。

則君臣相遇而初在包荒之內矣

上六困于葛藟于臲

藟

臲元

曰動悔有悔征吉象曰困

于葛藟未當也動悔有悔吉行也

上六自坤往柔而能升五互巽木而上居木末惟藤
蔓能困之兌陰爲秋夏之交有葛藟在樹之象居高
而柔有臲臲動搖不安之象故自言曰勿動動則悔
是戒動而不欲變終于困耳自言者兌口之象象所
謂尚口窮也下與三應藤蔓蒺藜交相係累不欲變
然處臲臲而求不動得乎所以必有悔也悔則變變
則通舍三而去其困自亨故吉蓋三之不祥已无見

上之期。上之艱脆已處必變之勢。困極自通。姤體見困斯遇矣。故曰征吉。象曰困于葛藟者。陰居上乘剛未當也。動悔有悔。吉者能動則其體變而初之臀困不行者。至是行也。行往下也。窮上則反下。故序卦受之以井。

困義生于木。巽木本高長而根著土則生氣通暢。今坎水漬于下。兌金刑于上。巽木互居中。坎豕柵其傍。疾藜據其下。葛藟蒙其顛。又互爲家人。木生堂宇之間皆困象也。惟九五剛中之主上剗其葛藟。下剗其疾藜。巽木始得著土成包瓜之杞。羸豕孚而困乃姤。

中體成乾而木始得見天日。承雨露有干霄之勢矣。

井三三

巽下坎上

序卦傳曰。困乎上者必反下。故受之以井。雜卦傳曰。井通而困相遇也。困六爻皆自上來下。有爲井之象。至井而後上行。水出于坎。井雖反困。然井初猶困也。遇于下而後反于上。卦象往來順逆。莫備于困井。蓋文王序卦。數法大衍至四十九而卦當革。困井與革。遇五氣萃而爻象隱。五氣生于天一爲坎水。萬物之命也。得水氣之先。莫如木。鑽木生火。火焚化土。土和生金。金凝生水。生于春。藏于冬。發于東。歸于北。齊于

巽勞于坎。四時以此順序。萬物以此生成。故天地之
化盛于西南。自巽而南而西北。至坎順行爲通。自坎
而西而南反巽。逆行則困也。困自否來。下坤變坎。上
乾變兌。由坎適兌爲逆。以本體正互數之下爲坎。次
上體本乾。次上爲兌。次下體本坤。次下互離。次上互
巽。六卦皆逆。故曰困遇也。逆行而往。與諸卦遇也。反
爲井。井自泰來。下乾變巽。上坤變坎。以本體正互數
之下爲巽。次上互離。次上體本坤。次下互兌。次下體
本乾。次上爲坎。六卦皆順。故曰井通也。順行而來。與
諸卦相通也。序卦傳曰。聚而上者謂之升。升而不已。

必困。故受之以困。困乎上者必反下。故受之以井。此造化往來通塞循環之象。而謂之井。何也。木出水也。水爲資生之始。得水之精。盡水之情者。莫如木。百尺之木。生于高陸。折其枝。則津液出。根入于黃泉。而潤升于數仞之顛。所謂巽乎水而上水。天一升降之妙用也。方春震木出至巽。坎氣寄于木。含水相見于離。致養于坤。西入兌金。則水得滋。而還歸于其宅。又至春木再動。循環無窮。此坎水通利在天之象也。在地水之通者。莫如井。古者穴地出水。交木爲韓。層累而上。砌以甕甌。故爻至四。始甃井。後世以甕甌易木。故

卦象上下二井。蓋卦遇將革井革鼎新。故鼎亦象上
下二鼎與井同。革九三云三就鼎九三云鼎耳革。其
象甚明。說者以今世井上桔槔象巽木。誤也。巽入也。
坎信也。井靜也。入故通而資之不竭。信故深而改之
不遷。靜故安而應之不勞。盛德之至也。君子具井之
德以脩己治人。宅心應事。通之至也。然象有吉凶何
也。君子善脩而不能必諸遇。井能養而用不用在人。
故井以及困爲通。觀三爻之辭可知也。上通則吉。下
入則凶。初井泥二射鮒則泉幾廢矣。三渫四甃井乃
可食。五泉食上勿幕而井始通。其于人也。初二沈淪

如巢許。三四清脩如孔孟。五六通利如堯舜伊周矣。卦主坎。陽剛清盈爲井中之泉。陰虛爲出汲之口。初陰井底爲泥。四在泉上爲口。二承陽元坎。故下漏。三泉泄出。故四脩砌。五陽剛中正。故泉美人食。上井通而困始化。由巽入坎。歷離坤兌乾。而巽初當春夏之交。水潦溷濁。故初爲井泥。二當離爲夏。故水多蟲魚。三四秋至而泉始清。三爲坤。泉洩地上。四爲兌。脩其毀折。五六冬矣。五值乾。故井寒冽。六終坎。故井收功。成犬抵下卦坎。水流行東南。失時不遇之象。故不吉。上卦水歸西北。得其鄉。故多吉也。

井改邑不改井。无喪无得。往來井井。汔吸至。亦未繙菊井。羸雷其瓶凶。

穴土用木爲榦出水曰井。井自困來有改象。坎爲水。有井象卦反困而坎陽居中。有不改之象。无喪无得。往來井井。卽不改之義。井以養爲功。以不變爲德。不爲汲者喪而虛。不爲不汲者得而盈。故爲无喪无得。汲而往者求旣得。汲而來者取不窮。故爲往來井井。然井所以能養。由水上出也。及至井所。亦有未引繩。汲井而羸敗其瓶者。无瓶何以出水。則井不得食。而人不受福。凶之道也。是以井有養人之德。惟人能

之汔及也。繙繩也。羸者破敗不勝任之義。

井以坎爲主。坎體本坤。坤爲邑。在困居下。在井居上。故爲改邑。古者在邑爲市井。在田爲鄉井。坎在下。田象在上。邑象往爲困。來爲井。往井來井。新舊依然。故爲往來井。井之象。井。謂井也。巽象井。井。謂汲井也。坎象卦內外二體似二井。九三井泄。出是下井之上也。井而又井者。源源不窮之義。彖因坎設象。而贊井德之有常。君子濟民利物。當如此矣。以學占。卽孟子云。資之深。取之左右逢源。大傳云。聖人極深研幾。洗心退藏于密。寂然不動。感而遂通天下之故。皆如此。

二至四互兌爲口。三至五互離爲大腹。瓶象兌爲毀折。羸其瓶之象。初二兩爻下虛上實。瓶入井。向下取水之象。三四兩爻下實上虛。瓶既得水。向上之象。九五一奇繫繻之象。上六一偶。瓶出井口之象。坎上之卦。凡八唯井六爻无險象。以水上出能養人也。他卦上爻多窮極。惟井鼎至上吉。以養人功成也。然井未免羸瓶之凶者。亦以險之故耳。利害相循。理數如此。彖曰。巽乎水而上水。句井井。句養而不窮也。改邑不改井。乃以剛中也。汔至亦未繙井。未有功也。羸其瓶是以凶也。

卦體巽下坎上古之爲井者穴土以木爲韓層累而
上然後砌以甕甕故卦上下似重井巽象木入水坎
象水出井故象云井井井而又井取之不竭養而不
窮也改邑不改井者坎水自困往上一陽居坤中不
變爲泉食之主也亦未繙井者已近水而未汲未有
致養之功也羸敗其甕者无出水之具不得致養是
以凶也

汲井壞甕无功而凶井之占也井自困來利出不利
入巽木入水其求太深雖養不窮而百應必有一違
凡易之道用忌傷體取戒過深汲長綆短水壯甕羸

无功反害。其理固然。凡植木者。壅本太深。水澤大滂。則不生。井凶之象。易道然也。是故受之以革。彖雖未及學易者。亦不可不知。

象曰。木上有水。井。君子以勞民勸相。

巽木入土。坎水上出。井之象也。君子觀象。知井之利。養惟以源泉活潑。故其斟酌不窮。凡民資生。何以異此。勞其民而勸勉輔相。使之勤業力本。資生長養。自无枯槁竭澤之患。非必分人以財。而利賴无窮。君子所爲井也。

吾里中人嘗掘地得古井。其制以木交午如井字。層

壘而上。卽古人所謂井韓者也。因知古聖尚象之義。解者謂以木爲汲水之器。則彖已言瓶甕非木也。或謂爲井上桔槔懸甕取水者。桔槔反在井上。與卦象。吳皆未喻。古人井韓之制耳。韓與翰通。築土者栽木夾版爲榦版。兩端障土者爲翰。井韓積木爲之。亦以障土。使水出其中。故又云井榦。漢武帝立井榦樓高五十丈。以其積木若井韓也。楊子重黎篇。茅蕉井榦之死。亦謂始皇殺諫者二十七人。積尸闕下。如井韓耳。以予所見正合。

初六井泥不食。舊井无禽。象曰井泥不食。下也。舊井无

禽時舍也

初六以巽主居井下入之最深者巽木春氣方盛水
泉正濁故爲井泥不可食井自困來故爲舊井初在
困上爲葛藟木末也今倒而浚入井底是木舊嘗棲
禽而今无禽矣巽爲雞爲鵲禽象言井廢禽不飲人
可知已象曰井泥不食者井以陽清爲泉上出爲功
六以陰居井下濁甚故爲井泥所以不食舊井无禽
者邑改井廢時舍不用也上无正應故有此象

卦由巽適坎東南行入西北初主巽二離三坤四兌
五乾六坎象亦各類七復來初值艮八復來二值震

艮水土交爲井泥黔喙故止不食震斗虛故象谷谷穀通震東爲谷風說卦方位正爲蹇解困井等爻象之例也

九二井谷射鮒

附

甕敝漏象曰井谷射鮒无與也

二當離位谷泉穴也離虛之象射水注也水遇火相射之象鮒鯽魚喜潛泥中以類相卽附麗之象夏水多蟲魚離爲魚甕汲水器燒土爲之大腹亦離象離爲乾卦甕敝漏之象由巽適坎經南離火不利水故有此象象曰井谷射鮒者陽實爲水二以陽居陰上无正應本可用之泉不能出以濟人徒下注射鮒而

已

井以坎爲體陽實爲泉陰虛爲井二以剛在中初陰偏在下上无與爲坎九三以陽揜其上水不得上故爲井谷下射之象甕敝漏亦谷射之義故傳不別釋穴下漏曰谷初在井底爲泥鮒喜卽泥故爲射鮒水在井下不上出則无用故有此象

九三井渫洩不食爲我心惻可用汲王明並受其福象曰井渫不食行惻也求王明受福也

九三純陽清潔之泉在下之上居巽之終齊乎巽故爲井渫渫與泄同水與韓齊而溢出所謂巽乎水也

有應在上而未離下故爲不食言无人取以爲食也由巽至坎此遇坤位水出地上清流无用行人惜之萬物致養乎坤井所以養故曰可用汲如王道清明君子向用則利澤及人遐邇受賜矣上有正應其象如此惻坎象也王指九五互離爲明陽爲福蓋井自三以上漸通而受制坤土猶未向用自此西北則通利之鄉矣象曰井渫出不食行人所惻惜也如彼賢者求王明而用之膏澤及人皆受福也求者期望之意

井通也及困則通賢人君子處困思遇之卦今人謂

因爲井中卽此義九三位歷坤方水出木上西南上應井宿故爻象于此明著其義周公居東孔子在春秋井渫不食之謂也

井以木出水而上砌以磚石此云井渫蓋舊井頽塌之象二至四互兌爲毀折故水洩出地上四始脩甃也

六四井甃無咎象曰井甃无咎脩井也

六四陰虛而通下互兌象井口甃砌也甃則井成可用此水出巽上行之始也自巽適坎此值兌爲附決爲毀折故有脩砌之象初泥四甃初舍四脩是以无

答

偶畫相對。壘砌之象。甃字從秋。兌秋之象。莊生秋水篇云。入休乎缺甃之崖。兌缺故甃也。三井水渫出。故四補甃其缺。甃用磚。磚自火出。互離之象。

大畜之九三。將行。則日閑其輿。衛井之六四。將食。故脩甃其井。士君子遇主。則乘時策勵。以應上求。子云。居則曰不吾知。如或知爾。則何以此之謂也。如此。然後可以求王明。而天下受福。

九五。井冽寒泉食。象曰。寒泉之食。中正也。

九五陽剛中正。在井之時。爲清冽寒涼之泉。取以爲

食也。互兌口之上有食象。坎體正北。故爲冽寒。五自乾初往而木至此。又值西北乾位。秋冬之交。霜降水寒。流潦皆清。而況于井。乾爲寒。爲冰。爲王。故有寒冽之象。象曰：寒泉之食。九五有中正之德。用賢以養民。所謂王明用汲而人并受福也。

上六井收勿幕。

密

有孚元吉。象曰：元吉在上。大成也。

井歸坎位。爻當坎極。故爲井收。收猶歸也。坎爲萬物所歸。猶成也。收功養成也。于時象冬。禮曰：旣蜡而收。收猶息也。物至冬休息也。輓轡在上。收緇引瓶。亦收象。幕。幕通掩蔽也。坎爲隱伏。有幕象。禮尊用罍。坎缶。

汲瓶之象。勿幕者。水自上出。取用通利。偶畫上開之象。下應九三。明王已遇受福者多。象謂无喪无得往來井井。其養不窮。而人皆信之。故爲有孚元吉。象曰元吉在上者。井以上出爲通。井收勿幕。則膏澤偏及利賴无方。其功大成也。

九五爲用賢之主。上六爲薦賢之臣。所謂爲天下得人舜禹之儔也。故元吉。世主有用人之志。大臣蔽賢不爲汲引。雖有寒泉未繙井而羸瓶。何由上達。大臣勿壅蔽則賢路開。而膏澤下究。所以致勿幕之戒也。

革

三三

離下
兌上

序卦傳曰井道不可不革故受之以革何謂井道不可不革革者變其故也邑可改而井不可改則物之故者莫如井矣序卦法大衍至革當四十九而遇井井之爲文四十其區有九古文井中有點象瓶爲大衍虛一之象天地之數五十革故鼎新以物理推之取水于井革之以火水出于上火革于下則烹飪致養君子有清通之德變易從時則可以濟世安民故革繼井也卦取離下兌上何也革物莫如火物遇火未有不革者火革他物利用因革水利用革水火相

親則革道不成。革者。皮隔物也。隔水火。惟土與金。水在釜。隔火。則成味。兌者。金水之會。而爲土于澤者也。火在澤下。不得上炎。則水息其濕。水在澤上。不得下流。則火息其燥。息者。止而生也。相制則止。相成則生。在人爲呼吸。在天爲寒暑。萬物相見。離火方盛。季夏土王。兌金將生。卦遇坤。以革。夏爲秋。革火爲金。不藉坤土。則金火不相得。故澤爲水土之合。而土者五行冲和之氣。能燥濕潤枯。含藏金氣。快利清響。而爲悅。故金水從革。土之力也。卦以兌互乾。皆金也。兌伏艮。乾伏坤。皆土也。水得金助。而火不能焦。離互巽木。火

得木助而水不能濕。革道所以成也。然彖謂已日孚何也。曰者離象。夫干已爲土。位居中。革當并鼎新故之間。亦中象。季夏土盛。物各成已。已爲心。心爲離。故道家以已土爲意。其中有信。五常信爲土。卽已也。土氣比合下順則比。上應則合。惟土能合水火之交。惟信能成上下之孚。火之革水得土而內外相息。聖主革代得信而上下相安。所謂已日乃孚也。下卦三爻離火用革。初日未至已。二中已日正革。三革事成就。皆火之功也。上卦三爻革而成悅。四受天命。五正天位。六天下化成。皆所爲悅也。革而悅乃孚。悔亡已日。

之功也。大抵革者非常之事。卦自萃以來。天下望明主之升久矣。天生明主。置之困窮。以成井養之德。有德然後可以革。故鼎新。出震為主。故革居井鼎間。如革物者。取水于井。熟之以火。而後升于鼎。革命者有大德而後能舉大事也。卦自五以下。互爲同人。君子所以通天下之志也。二以上互爲大過。君子所以獨立不懼也。中互爲姤。王者所以施命誥四方也。離明在下。人心協應之象也。兌悅在上。天心豫順之象也。互乾居中。上帝臨汝之象也。如是乃可以行湯武之事。

革。已日乃孚。元亨利貞。悔亡。

革。變也。物相代成。變。已。土象。在人爲意。爲信。日。離象。已。日說見前。人心和悅而後革可孚。革而孚。則更始重新。故四德備也。在革之初。聖人未免于悔。旣革而孚。悔斯亡矣。

隨者。揖遜之事。舜文是也。革者。征誅之事。湯武是也。故皆爲元亨利貞。

彖曰。革。水火相息。二女同車。其志不相得。曰。革。已日乃孚。革而信之。文明以說。悅大亨以正。革而當。其悔乃亡。天地革而四時成。湯武革命。順乎天而應乎人。革之時。

大矣哉

卦謂之革者。下火上澤。澤土盛水。火焚其下。水火相止而相生。燥濕往來。如人之息。故謂之息。卦位由離之兌。坤土隔其間。以相息也。離中女。兌少女。二女同居。水火不相得。三陽互乾爲父。以隔于其中。故曰革。已日乃孚者。已爲土。火得土以變水。而水悅。大君得天人之心。以革代而人孚。蓋離火文明。有其才也。兌以說有其民也。大亨有其時也。剛柔中正。有其德也。如是則革而當矣。其悔乃亡。不如是而革。未有不悔者。天地二氣相代。四時成序。以孚革也。湯武除暴安

民順天應人亦以孚革也。故革惟天地聖人善用之造化所以成物。世運所以維新也。其時豈不大哉。象曰澤中有火革。君子以治歷明時。

兌爲秋離爲夏以離遇兌夏秋之間金火相克而反相生故爲澤中有火革之象也。君子觀象而知天地變革莫大乎四時。聖人革代莫大乎歷數。天行雖有常度然七政之行至千歲而必差。歷代雖有常主然王者之姓數百年而必改。語云四時之序成功者退。天地帝王同也。觀于夏秋之交暑往寒來而知曆象。觀于金火之交相克相生而知改革。故治歷以明時。

革之首務也。堯禪舜曰。曆數在爾躬。夏商周三正代變。夫子作春秋。首王正月。告顏子爲邦。先行夏時。帝王繼世。改元頒朔。革道莫大乎是。

不言澤下有火。火上有澤。何也。火在水下則滅。非反而相代之理。澤中有火。二物相克相成。彖傳同居相息之象。水變火。則成寒灰。火變水。則生滋味。故湯武之征伐。義以行仁。雖革其命。其子孫世饗。是以革取兌不取坎。坎水下流。无金土之和。則煙銷燼滅。是秦漢以來。帝王之革命者耳。豈湯武之舉乎。

易者變也。革亦變也。故易數成于革。數莫備于五十。

大衍五十虛一其用四十有九革卦正當四十九大
衍一週雜卦云革去故鼎取新其占爲元亨利貞元
吉其象爲治歷明時正位凝命過此又十五卦易數
終矣五十十五人生百年期盡而開物成務事畢然
四十九革故五十鼎新而象以曆數繫之革者蓋鼎
新于來年曆終于今年來年之曆頒于今年其象如
此後世用四十九起數作大衍曆用象義也

初九鞏拱用黃牛之革象曰鞏用黃牛不可以有爲也
革非聖人得已也變不可輕圖初不可妄動故爲鞏
用黃牛之革鞏固持也初九陽剛離火躁烈是用固

持黃爲中。二象也。牛柔物。離象也。初包二。革象也。初依二爲中。未可先時自用也。皮无毛曰革。所謂虎豹與犬羊同。未變之象。火不就下。日必待中。上无正應。時未可動。固守其志。以俟己日也。象曰。鞶用黃牛者。初未可有爲也。詩云。於鑠王師。遵養時晦。此之謂也。○離本乾體。天象。火爲心。人象。故天火爲同人卦。自初至五互同人。天人交孚。故離爲革。主文明中正。故二爲離宗。離體相麗。處變革之時。初尤不可失。二故爲鞶。用黃牛之革。二爲黃牛。初在外爲革。猶皮之包體。麗象也。

六二已日乃革之。征吉。无咎。象曰：已日革之，行有嘉也。舉大事者以時爲本，初不及時，三過時，惟二得中正。變革之時，自初適二，則位變矣。易九爲六，則畫變矣。以陰居中，是爲已日，已爲土，中象也。日離象也，已爲人，日爲天，天人交會，內明外悅，剛上柔下，得正而應。二往互巽，火遇木熾；三往互乾，金資水潤。二女志通，乾道下濟，故革无如二當矣。以此往革，牛可爲虎，吉又何咎。象曰：已日革之者，行有嘉尚，得九五之應也。上功曰嘉，指虎變而言。其戎衣一著之時，與卦體自二至上，互爲大過生死之際，革之時也。自二

至五互爲姤。姤遇也。遇者。遭逢適然。聖人之不得已。亦革之時也。

九三征凶。貞厲。革言三就。有孚。象曰。革言三就。又何之矣。

三以陽居陽。爲離之終。內外之交。上遇澤土。隔水以致火。二旣革矣。過則焦爛。故征凶。水火相守。故貞厲。蓋三與上雖應。而處革之時。二女不同志。往應則失。革貞固惕厲。處革所宜。革之爲言也。至三而成天運。三月而成時。人官三年而成治。易數三變而成爻。故十有八變而成卦。八卦而小成。爻至三而離體成。乾

離同體。三遇互乾九三乾道乃革。革以乾爲主。由三至五乾體備而革事就。乾爲言兌亦爲言。故爲革言三就三五同功。乾道純一。故爲有孚。象曰革至三旣成就矣。更何所求。蓋聖人之爲革也。以故者不可因去其太甚。取殘伐罪已耳。過此更往。則墟人之國邑。覆人之宗祀。聖人不爲。其過劉定功之時與。

凡革之事。時未至。其守宜固。旣至。其變宜決。少有係累。非遲疑而喪機。則躁擾而多事。故爻唯二五剛柔正應九三重剛。未免過猛。當外之交。上有繫應。其志未定。天命已集。大業已就。而別圖趣向。非識時務者。

也。故九三勿往。則成豹變之君子。攀龍附鳳。以應明主。上六勿往。則成革面之小人。回首向風。以從順治。故其占皆征凶。處革之世。貴從而已矣。

集大事者。以天命爲本。武王伐殷。會于牧野。人曰。上帝臨汝。勿二爾心。故能一戎衣有天下。詩所謂致天之届也。卦爻三爲人位。互乾在三。上帝降臨之象。是以革言三就。互巽。帝命之象。詩云。天降在下。有命既集。故傳決之曰。又何之矣。卽勿二勿虞之意。

九四悔亡。有孚改命。吉。象曰。改命之吉。信志也。

九以陽居陰。爲悅之始。當烈炎之衝。水在澤中。受其

鍛煉二女同居焉。得无悔然。三就革成。寒烈之性。變爲五味。其悔可亡。皆六二之功也。二四同功。故爲有孚。不相怨而反相信矣。居上下之際。互爲巽。有改命之象。景運方新。故吉。象曰。改命之吉。人心悅而信之。非富天下也。其八百諸侯推戴之日乎。

自三至五皆有孚。互乾同體之象。明而悅以應乾。故有孚。四當離兌之交。離夏兌秋。先儒謂商周之際。天地之秋。其象宜爾。

革言三就而四始改命。何也。湯武征誅。非以天下自利也。退而復諸侯之位。諸侯共推以爲天子。三讓不

得而後受。故傳曰。信志舜禹受禪。避堯舜之子。至天
與人歸。乃就位。孟子云。居堯之宮。逼堯之子。是篡也。
非天與也。卽信志之義。人主志與天通。惟志不可僞。
惟天不可欺。聖訓切至矣。

九五大人虎變。未占有孚。象曰。大人虎變。其文炳也。

九五陽剛中正。革命之主。故稱大人。虎爲山獸之君。
西方之宿。兌象也。鳥獸之皮。秋而毛毳。大人以英杰
之姿。陽剛之才。順天應人。以膺大寶。頽運不振。世道
維新。始者黃牛之革。至是改觀。故爲虎變。下與六二
正應。居互乾之上。三陽同德。中外大悅。故爲未占有

孚言不必應而皆孚。詩所謂成王之孚。天下信之也。離爲龜。兌爲決。有占卜之象。未占而孚。猶云不戒而信也。象曰。大人虎變者。虎皮之文。宣明踈朗。炳然可觀。聖人在天位。創制立法。文章煥乎。宸極生輝。无復紫色餘氛。以黷天光。其皇王維辟之日乎。

五下應二。二爲離主。至五離牛變。兌虎明主起草昧卽真之象。淮南子云。牛哀病七日化爲虎。緣飾易象流而爲怪者也。上六成兌之主。兌爲羊。羊變豹。因五而爲象也。上因于五。人臣從王之義。羊小于牛。豹小于虎。虎文宣朗。豹文叢鬱也。

上六。君子豹變。小人革面。征凶。居貞吉。象曰：君子豹變，其文蔚也。小人革面，順以從君也。

以陰居陰，當革終悅極，天下化之，故爲君子豹變。豹似虎而小，陽爲君子，指九三陰爲小人，指上六三上正應也。君子在內，宣猷効力，變而爲豹，以從虎。小人在外，望風引領，變而革面，以向內。世運再造，從革則吉。若更有往，卽同梗化凶之道也。安靜守正，故吉。象曰：君子豹變者，豹文蔚然，叢密。君子所以贊皇猷也。小人革面者，遠人回面，內向小人，所以從君也。克爲悅，有面象。皇風丕變，其錫極作新之日乎。

革之終王者甄陶一世成就之象君子當斯世皆有
德業聞望猶所謂鳳毛麟趾非凡鳥下駟之比小人
當斯世皆承風向化猶所謂朝陽拱極无心非巷議
之民三上係應三不可往三不可來蓋於變時雍君
子小人各得其所內外遠邇上下各便其居所謂親
賢樂利居貞則吉往則凶往凶如中庸所謂自用自
專菑及其身也居貞如所謂不驕不信民得寡過也

鼎三三巽下
離上

序卦傳曰革物者莫若鼎故受之以鼎鼎者新命之
象昔禹平水土九州攸同鑄九鼎以象九州歷代寶

之夏桀亡鼎遷于商紂亡武王遷之于周成王定之
郊廓故三代革命定鼎此其大者也爲卦兌金在上
又互乾金離火在下又互巽木木火鍛煉有鑄鼎之
象澤水在上有烹鼎之象下巽象鼎足高長也上離
象烹飪炎熱也蓋水火民用最急故井鼎爻象相似
井合水木上下似二井鼎合火木上下似二鼎井九
三水渫似下井之口六四修甃似上井之底鼎九三
耳革似下鼎之耳九四折足似上鼎之足合爲一彷彿
似二蓋井以水爲主下象井而上象水鼎以火爲
用下象鼎而上象烹井汲在上故坎居上而上卦多

吉。鼎烹亦在上。故離居上。而上卦亦多吉。二卦先後
遇革。革言三就。故井三修。鬻舊井變爲新井。鼎三耳
革。舊鼎變爲新鼎。革。革命也。鼎。命器也。人君撫有大
寶之象。故二卦皆取象乾金。皆互乾在中。乾爲天。爲
君。在身爲元氣。命所以凝也。革三四五皆有孚。鼎二
三四皆象實。其所重可知矣。大抵困井革鼎四卦。極
五氣升降之變。坎水離火兌金巽木。四象往來。土寄
四象之中。坎在澤下。困而成井。井成。則坎水上出而
井通。火在澤下。革而成鼎。鼎成。則離火上出而鼎新。
萬事萬物。各有困革。士君子養身養德。濟入利物。皆

有井鼎必困遇而後井通必故革而後鼎新也往來屈伸易道自然聖人畫卦設象通其故而已矣

鼎元吉亨

鼎者祭享薦熟之器身如釜而三足兩耳鑄金爲之上有鉉貫耳而舉今之茶爐其遺制也古者茹毛飲血聖人鑽燧取火教民烹飪始有鼎夏禹鑄九鼎象九州三代以爲世寶武王革商周公奠之于洛邑故繼革以鼎卦體下巽順而上文明調元贊化之道也故其占元吉亨通

彖曰鼎象也以木巽火亨飪也聖人亨以享上帝而大

亨以養聖賢。巽而耳目聰明。柔進而上行。得中而應乎剛。是以元亨。

凡卦皆象。惟鼎象器。器莫重于鼎。制器尚象。故鼎獨以象釋。初偶爲足。五偶爲耳。中三奇爲實。上一奇爲鉉。鼎之象也。下巽上離。以木入火。鼎烹之象也。自革而來。王者撫有神器。定鼎之象也。故曰象其占爲元吉。亨何也。鼎聖人用于祭祀。以烹犢享上帝。明德格于天也。用之賓客。以烹大牲。養聖賢。誠敬通于人也。此鼎之用也。巽爲鼎腹。順而在內。五爲鼎耳。離爲鼎目。是外而耳目聰明也。離柔進而上行。五爲離主。得

周易正義 卷十四 三
中下應乎巽二之剛。是以柔順聰明。協于上下。以承天休。凝命方新。而得大亨也。

巽下入爲足。爲腹。離上明爲耳。爲鉉。柔進上行。水氣上承也。柔得中應剛。火氣下濟也。此鼎取象之義。而皆以五爲主。離中虛。故耳目聰明。巽稱隱上入。離中虛下應。故聲入心通。官止神行。成聰明之德。所以正位凝命也。

巽而耳目聰明。三語發揮卦德全體之義。內有巽順之德。則形骸不同于土木。元氣周流。視明聽聰。故成調燮之功。苟剛愎自用。忠言逆耳。煬竈蔽明。上下不

交而頑聾痿痺之疾生詩云自有肺腸俾民卒狂何以調理大化斟酌元氣爲正位凝命之主乎

象曰木上有火鼎君子以正位凝命

離上巽下是木上有火也以木然火烹飪之象故爲鼎君子觀于上而得離明出治之象居高位不可不正也觀于下而得木火相生之象命旣革不可不凝也鼎之爲物莊嚴端重繼革之後天命未定正靜安重則神器寧而壽命以固凝聚也凝其革故之命也大抵井鼎二卦皆以生氣爲命木者天地生氣水火之會井木上有水津液自木出也鼎木上有火英華

周易二角 卷十四 三十一
自水生也。无生氣則水火无根。故觀井象。養民于下。以滋其潤澤。觀鼎象。自養于上。以固其壽命。養身養德之義備矣。勞民勸相。知者樂也。正位凝命。仁者壽也。

鼎器安重。故世代革而鼎不改。君子凝命。莫如居正。思不出位。以守至正。則淫聲邪色不干。非僻不入。安寧長久之道也。異爲長。離爲視。道家長生久視。丹鼎烹煉之說。緣飾于此。

初六鼎顛趾。利出否。鄙得妾以其子。无咎。象曰。鼎顛趾。未悖也。利出否。以從貴也。

六自革上來居鼎初有顛象在下而偶鼎趾之象否不潔也鼎新出革泥滓不潔有否象虛鼎將薦必先洗滌顛其足以出垢趾顛則鼎傾惟虛鼎出否則利若九四有實則折足不利矣初爲巽女以柔居下有妾象上應四不中正有妾子之象四公餗有貴象欲奠鼎則不得含足如欲從子則不得棄妾也象曰鼎顛趾不言凶咎者在初无實未爲悖理也利出否者將以薦實也上與四應妾因子貴上達也

鼎之正位必資于足跛倚欹傾非凝命之度惟出否則可耳有實在內趾少不安將如四之覆餗矣爻義

本謂奠鼎足不可不正。非謂趾可賤也。士君子行止不端。欲心正身脩。不可得。故曰視履考祥。凝命之基。妄以子貴之謂也。

九二鼎有實。我仇求有疾。不我能卽。吉。象曰。鼎有實。慎所之也。我仇有疾。終无尤也。

二以上象鼎腹。互乾象。鼎實陽實也。仇匹也。指六五二五正應。間于三四兩陽。有阻隔之象。故爲有疾。卽就也。鼎有實。宜就而方實。尚未可食。待實成而後就吉之道也。象曰。鼎有實。將以享也。而行必由耳。耳在五進隔諸陽。當慎所之也。我仇雖有疾。不能就而實。

成自就終无過尤也。實成在四。二巽隱入腹。五耳目聰明。故慎所往。自可无過。

卦體離爲牛。爲雉。爲魚鼈。巽爲雞。互兌爲羊。皆鼎有實之象。

九三鼎耳革。其行塞。雉膏不食。方雨虧悔。終吉。象曰：鼎耳革。失其義也。

九三上應鼎鉉。鉉以耳受。三以陽實其腹。居下體之上。不遇偶。故爲鼎耳革。革變也。言无耳也。古鼎耳有在腹旁者。有在口上者。九三不中有變象。故其腹无耳。變居五也。自革來。故言革。亦以示取象二鼎之義。

鼎无耳受鉉則不可舉故爲其行塞塞陽實之象實
方得中可食而行塞不可薦故爲雉膏美而不食之
象猶井三之求王明未遇也雉離象商書武丁彤日
有雉升鼎耳祖已作訓辭象或取諸此雨剛柔和也
三五同功三剛五柔至四實滿至五遇耳可鉉鼎行
可卽故剛柔和爲方雨也五互兌爲澤雨象虧缺也
偶象悔卽不食之悔五遇偶實缺耳出鼎鉉可薦故
曰虧悔吉象曰鼎耳革者在上之下鼎當有耳无耳
不行失鼎之義也子云君子之仕也行其義不仕无
義九三尚未離下也

鼎耳在腹旁者。貫鉉以舉。如今茶爐之類。後世于上加釜盛實。故爻有重鼎之象。井上有井。以象水也。鼎上有鼎。以象食也。二卦當革之際。革言三就。故井鼎至三。皆有新舊變更之象。上鼎有耳无足。故九四折足。下鼎有足无耳。故九三耳革。三上无應。三耳革。爲上革也。初四正應。初顛趾。故四折足也。

九四鼎折足。覆公餗。速其形渥凶。象曰。覆公餗。信如何也。

以陽居四。不中不正。下與趾應。鼎至四實滿。而初趾顛。故爲鼎折足。居上體之下。其畫奇。有缺足之象。足

折故傾其所實之餽餽菜類鼎用享故稱公四近五
公象也形狀也渥作劇當作跣則足也鼎足折其狀
似跣故大傳言不勝任也互兌毀折之象大臣相天
子調燮神器下比小人以致名實虧損股肱墮壞其
象如此其凶可知象曰覆公餽者四下應初信而任
之因顛以致折始不擇人而終果如何也九四才地
非不美其失在應初居高位而信小人所以敗耳
形渥鄭康成虞仲翔謂形作刑非也其所解刑劇亦
非也周禮秋官司烜氏邦屋誅鄭引其刑劇爲徵謂
爲誅三族也故新唐書于元載死籍其家贊曰鼎折

是其形劇諒哉用鄭說耳按屋誅謂古者天子同姓
有罪不卽市戮于甸師隱處如亡國之社屋之屋不
令衆見也與劇異且夷族非祥刑聖人不以訓大臣
信小人敗誅不至族鄭說附會過也古刑劇䟽兀字
通用莊子德充符云魯有兀者王骀又兀者叔山无
趾又申徒嘉兀者皆罪人刑足者也兀月音義通月
形半缺故足不全曰刑論語小車无軌軌亦音月謂
車衡下有缺如半月以扼馬頸也考工記旄人凡陶
旄之事髻墜薛暴不入市髻註亦讀作兀六經文字
通融假借多類此不如字書拘拘也

六五鼎黃耳金鉉利貞象曰鼎黃耳中以爲實也

六五柔中居尊文明之主居鼎實之上其畫偶象兩耳離伏坎爲耳離中坤爲黃黃中通理聰明之象也互乾爲金鉉貫于耳挈之以行鼎本謂上九而五下應二故鉉上則爲玉鉉下則爲金金玉皆乾象乾爲鼎實鼎重在實舉則挈鉉而上奠則鉉委腹旁在五鼎尚未舉故其象如此王輔嗣云能以通理納乎剛正蓋二巽能入五明能受所謂應乎剛耳目聰明也鼎器重而內有實離火方炎利于安貞所謂正位凝命也象曰鼎以薦實得耳貫鉉實乃可薦五得中故

能以黃耳納金鉉。享帝養賢。明德之馨。豈和羹之虛文耶。

上九鼎。王鉉大吉。无不利。象曰。王鉉在上。剛柔節也。

鼎至上而享九。以陽居上。其畫奇。橫于耳上有鉉象。王乾象。乾離同體也。下應九三耳革行塞。今舉鼎以薦。故上其鉉爲鼎王鉉之象。離火方炎。惟王耐火。貴重比德。溫潤而忠信。以之享帝養賢。大吉无不利也。陽爲大。所謂巽而耳目聰明者。利諸用矣。象曰。王鉉在上者。王性溫能勝火。火雖熱不能傷王。五以柔承剛。上以剛乘柔。金和而王節以溫劑燥。故曰剛柔節。

中和之德也

上如師保大臣調燮神器爲六五所嚴重故爲剛柔
節上剛五柔也五爲文明之主柔順聰明是爲黃耳
上爲拂直之臣啟心沃心是爲王節明良相得所以
建中和之極位天地育萬物調元贊化鼎道大成也
○凡烹飪之事貴水火適宜寒煖得中周禮食醫云
食齊視春時羹齊視夏時醬齊視秋時飲齊視冬時
齊卽水火寒熱之節也王性溫中和之象故以爲鼎
德之至

周易正解卷十四終